

## **31/2004 DEKRETUA, otsailaren 10ekoa, Euskal Autonomia Erkidegoko bingo-jokoaren araudia onesten duena.**

Gernikako Estatutuaren 10.35 artikulua Euskal Autonomia Erkidegoari jokoan ematen dizkion eskumenak direla bide eta gure lurralde-eremuan jokoak garatzen duen azaroaren 8ko 4/1991 Legea garatzeko ematen da araudi hau.

Orain ordezkatu den bingo-jokoaren araudia Herrizaingo sailburuaren 1988ko otsailaren 19ko aginduaren bidez onetsi zen. Luzaroan iraun du indarrean araudi horrek eta, horregatik, sarritan aldarazi behar izan da, bere ezarpenak legearen manuei egokitzeko, eta bere edukia etengabe aldatzen ari den gizarte-errealitateari egokitzeko.

Horrenbestez, araudi honek, teknika juridikoaren ikuspegitik, funtzio hirukoitza betetzen du: aurreko araudia egokitzeko aldarazpenek sortu duten sakabanaketari bukaera ematea, aruari dagokion lerruna ematea, eta bingo-jokoa arautzeko esparruari modu orokorrean ekitea.

Bestetik, bingoaren gizarte-bilakaerari dagokionez, azken urteotan bingoaren erakargarritasuna gainbehera joan da gizartean, oro har. Arauan eginiko aldarazpenei esker, beherakada hori leundu egin da. Gorabehera kroniko horien jatorria izan da, batez ere, jokoaren jatorrizko ereduari eta bere araudiari estuegi jarraitu izan zaiela. Horregatik, aisialdiaren sektoreak egun behar duen malgutasuna eta egokitzapena ezin izan ditu bereganatu. Izan ere, aisialdiaren merkatuan gero eta lehia handiagoa dago.

Egoera hau denboran luzatzeak joko-enpresen gainbehera dakar, poliki-poliki. Honela jarraituz gero, azpisektore honen iraupena bera arriskuan jarriko da. Horregatik, enpresei behar dituzten tresnak eman beharra planteatzen da, aisialdiaren merkatuan lehiatu ahal daitezen, jokoaren gainerako azpisektoreek eta beste azpisektore ekonomiko batzuek dauzkaten baldintza beretan.

Horregatik, araudi honen ekarpenik garrantzitsuenetako bat da jokoaren mekanikan bertan zenbait aldaketa sartzea eta modalitate berriak asmatzea. Horrela, bingoaren berezko ezaugarriak gordez, azpisektoreko enpresek behar den malgutasuna izan ahalko dute jokalariek une bakoitzean nahi duten baldintzak bete ahal izateko.

Azkenik, bingo-jokoan teknologia berriak sartuko dira, bai bere osagaietan, bai bere garapenean, bai joko-lokaletako sarbideak kontrolatzeko baldintzetan.

Hori dela bide, Herrizaingo sailburuak proposatuta, Jokoaren Euskal Kontseiluak aldeko txostena eman duenez, Eusko Jaurlaritzako Aholku Batzorde Juridikoarekin bat etorritik, eta Gobernu Batzordearen 2004ko otsailaren 10eko batzarrean eztabaidatu eta onetsi ondoren, honakoa

XEDATU DUT:

**Artikulu bakarra.**– Euskal Autonomia Erkidegoko bingo-jokoaren araudia onestea. Araudi horren testua dekretu honetan sartuko da.

XEDAPEN INDARGABETZAILEA

1.– Dekretu hau indarrean sartzen denean, honako xedapen hauek indargabetu egingo dira:

- a) Herrizaingo sailburuaren 1998ko otsailaren 19ko agindua, bingo-jokoa arautu zuena.
- b) Herrizaingo sailburuaren 1989ko abenduaren 22ko agindua, bingo-jokoaren araudiaren zenbait arloren osagarri izan zena.
- c) Herrizaingo sailburuaren 1996ko abuztuaren 2ko agindua, interkonektatutako bingo pilotua arautu zuena.
- d) Herrizaingo sailburuaren 1996ko urriaren 3ko agindua, interkonektatutako bingo pilotua arautu zuen 1996ko abuztuaren 2ko agindua zuzentzeko emana.

2.– Halaber, dekretu honetan ezarritakoaren aurkako diren xedapen guztiak indargabetu egingo dira, dekretu honen lerrun bera edo txikiagoa badute.

#### AZKEN XEDAPENAK

**Lehenengoa.**–Herrizaingo sailburuari ahalmena ematen zaio Dekretu hau garatzeko eta burutzeko behar diren xedapenak eman ditzan, batez ere honako hauei dagozkienak:

- a) Bingo-jokoaren modalitate ezberdinetan erabili beharreko joko-txartelen ereduak eta ageriko balioa.
- b) Bingo-jokoaren modalitate ezberdinetako joko-arauak.
- c) Dekretu honetan ezarritako balizko konbinazio-lote bakoitzaren joko-txartelen kopurua aldatzea, eta bingo modalitateetako sarien ordena aldatzea.

**Bigarrena.**– Bingo-jokoaren araudian aipatzen diren bingo-jokoaren modalitateak informatika sareen bidez, sare telematikoz, satelite bidez edo bestelako urruneko komunikazio edo konexio sistemen bidez egin daitezke, bingoan jokatzeko lokaltzat jotzen diren lokaletatik kanpo, Herrizaingo sailburuaren aginduz xedatzen denaren arabera.

**Hirugarrena.**– Dekretu hau Euskal Herriko Agintaritzaren Aldizkarian argitaratu eta biharamunean jarriko da indarrean.

Vitoria-Gasteizen, 2004ko otsailaren 10ean.

Lehendakaria,

JUAN JOSÉ IBARRETXE MARKUARTU.

Herrizaingo sailburua,

JAVIER BALZA AGUILERA.

### ERANSKINA

#### BINGO-JOKOAREN ARAUDIA

##### I. KAPITULUA

#### XEDAPEN OROKORRAK

**1. artikulua.**– Xedea eta aplikazio-eremua.

Bingo-jokoa Euskal Autonomia Erkidegoan arautzea da araudi honen xedea.

**2. artikulua.**– Definizioak.

Araudi honen ondorioetarako, ondokoak definitu dira:

- a) Bingoan jokatzeko lokalak: Bingo-jokoak eta, hala egokitzen bada, bere zerbitzu osagarriak (araudi honetan xedatutakoaren arabera) kudeatzeko eta ustiatzeko baimena duten establezimenduak.

- b) Joko-aretoak: Bingoan jokatzeko lokaletan, bingoaren modalitate ezberdinetan jokatzeko beren beregi baimenduta dauden aretoak.
- c) Enpresa titularrak: Aldez aurretik baimena edukirik, bingo-jokoaren modalitate ezberdinak ustiatu ditzaketen pertsona fisiko eta juridikoak.
- d) Langileak: Aldez aurretik agiri profesionala edukirik, araudi honetako xedapenak betez, baimentzen diren bingo modalitateak garatzeko lan egin dezaketen pertsonak.
- e) Jokorako elementuak: Bingo-jokoaren modalitate bakoitza garatzeko behar diren gailu, tresna, mekanismo edo dispositiboak, araudi honetan ezarritakoa betez. Joko eta Ikuskizun Zuzendaritzak aldez aurretik baimendu eta homologatu behar ditu.
- f) Bingoan jokatzeko makina lagungarriak: Jokalariak bingoan jokatu ahal izateko behar diren gailuak, txartel fisikoak ordezkatzeko dituztenak.
- g) Jokoaren sistemak eta instalazioak: Jokalariak bingo-jokoan parte hartu ahal izateko, nagusiki edo modu lagungarrian, erabiltzen diren joko-elementuen konfigurazioa. Sare informatikoak, telematikoak, satelitea edo urruneko bestelako komunikazio edo konexio bideak erabiltzen dituztenak ere bai.

**3. artikulua.**– Araubide juridikoa.

1.– Bingo-jokoa baimentzeko, antolatzeko eta garatzeko, araudi honetako arauak eta arlo horretako bertako arautegiko arauak bete beharko dira.

2.– Debekatuta daude bingo-jokoaren bestelako modalitateak, araudi honetan ezarri ez badira, izen bera edo beste bat izanik ere. Araudian ezarritako baldintzak bete eta baimenak izan gabe egiten diren modalitateak ere debekatuta daude.

**4. artikulua.**– Bingo-jokoaren modalitateak.

Araudi honetan sartzen diren arauen arabera, bingo-jokoaren modalitate hauek ezartzen dira:

- a) Bingo tradizionala.
- b) Bingo pilatua.
- c) Interkonektatutako bingo pilatua eta sari "berezia".
- d) Bingo eratorria, bertsio guztietan.

**5. artikulua.**– Bingoan jokatzeko lokalak eta bitartekoak.

1.– Bingoan honela joka daiteke, bere modalitate ezberdinetan:

- a) Bingoan jokatzeko beren beregi baimenduta dauden lokaletako joko-aretoetan.
- b) Sare informatikoak, telematikoak, satelite bidez, edo urruneko bestelako komunikazio edo konexio bitartekoak erabiliz, garatzen duen arautegian xedatutakoaren arabera.

2.– Euskal Autonomia Erkidegoko bingo-areto guztien edukiera, guztira, hamar mila pertsonakoa izango da, gehienez ere.

3.– Bingoan jokatzeko lokalak lehen eta bigarren kategoriakoak izan daitezke, edukiera honekin bat etorritz:

a) Baimendutako joko-aretoetan 150 eta 300 pertsona arteko edukiera dutenak bigarren kategoriako lokalak izango dira.

b) Baimendutako joko-aretoetan 301 eta 600 pertsona arteko edukiera dutenak lehenengo kategoriako lokalak izango dira.

4.– Ezin izango dira bingoan jokatzeko lokalak baimendu, baldin eta haien joko-aretoaren edukiera 150 pertsona baino gutxiagokoa bada.

5.– Aurreko idatz-zatietan aipatu den edukieran bingo-jokoaren modalitate guztiak sartzen dira.

6.– Bingoan jokatzeko lokaletan ezin da sartu baimenean agertzen den gehieneko edukiera baino pertsona gehiago.

## II. KAPITULUA

### BAIMENA EMATEKO ARAUBIDEA

**6. artikulua.**– Enpresei baimena emateko baldintzak.

1.– Zuzenbidean onartutako sozietate-formak dauzkaten pertsona fisikoak eta pertsona juridikoak bingo-jokoaren enpresa titular gisa baimendu daitezke, baldin eta haien xede bakarra baimen hori ustiatzea bada, kapitulu honetan ezarritako prozedura eta baldintzak betez.

2.– Baimen hau ezinbesteko baldintza izango da Euskal Autonomia Erkidegoaren eremuan bingo-jokoa kudeatzeko eta ustiatzeko. Halaber, lokal bakoitza ustiatzeko instalazio eta funtzionamenduko baimen indibiduala beharko da, araudi honetan ezarritako prozedura betez.

3.– Sozietate-forma daukaten eta bingo-jokoaren titularrak diren enpresen gutxieneko kapital soziala 90.000 euro izango da lehen kategoriakoentzat, eta 48.000 eurokoa bigarren kategoriakoentzat. Kapital sozial hori akzio edo partaidetza izendunetan eratuko da, eta erabat harpideturik eta ordaindurik egon behar da. Kapital horiek transmititu ahal izateko, Joko eta Ikuskizunen zuzendariak baimena eman behar du aldezturik.

4.– Araudi honetan arautzen diren enpresetan atzerriko kapitalak zer nolako partaidetza izango duen zehazteko, atzerriko inbertsioak arautzen dituen arautegiak xedatzen duena bete behar da.

**7. artikulua.**– Baimena edukitzeko ezgaitasuna.

1.– Pertsona fisiko edo sozietate bat ezin da inola ere izan bingo-jokoa antolatzeko edo egiteko baimenaren titular, baldin eta bere kapitalean partaidetza daukan pertsonaren bat honelako egoeraren batean badago:

a) Baimenaren dataren aurreko bost urteetan epai irmo baten bidez faltsutze-delituengatik, jabetzaren aurkako delituengatik edo ogasun publikoaren aurkako delituengatik kondenatuta.

b) Porrot egin eta errehabilitatu ez direnak. Legez ordainketa-etenduran daudela edo hartzekodunen konkurtsoa dagoela deklaratu dutenak, baldin eta kaudimengabe jo badituzte edo euren betebeharrak osorik betetzen ez badituzte.

c) Azken bost urteetan jokoari buruzko zerga arauen urradura larri bi edo gehiagorengatik zehatuak izan direnak, epai irmoaren bidez.

d) Azken bost urteetan bi urraketa larri edo oso larri egiteagatik (jokoa arautzen duten Euskal Autonomia Erkidegoko arauak edo estatuan indarrean daudenak ez betetzeagatik) ebazpen irmo baten bidez zehatutakoak.

2.– Halaber, aurreko idatz-zatian aipatzen diren baimenen titular ezin dira izan Eusko Jaurlaritzako Joko eta Ikuskizun Zuzendaritzari (edo bestelako eremuetako administrazioetan antzeko erakundeei) lan arrazoiengatik loturiko edo atxikitako pertsonak, euren ezkontideak, eta euren gurasoak eta seme-alabak.

**8. artikulua.**– Enpresei baimena emateko prozedura.

1.– Bingo-jokoaren enpresa titularra izateko baimena gura duten pertsona juridikoek eskaera-idazkia aurkeztu behar dute, Administrazio Publikoen Araubide Juridikoari eta Administrazio Prozedura Erkideari buruzko azaroaren 26ko 30/1992 Legearen 70. artikuluan ezarritakoa betez. Eskaerarekin batera agiri hauek aurkeztu behar dituzte:

a) Eskatzailearen Nortasun Agiri Nazionalaren edo agiri baliokide baten fotokopia. Sozietateen kasuan, administrari, kontseilari eta bazkideenenak.

b) Sozietatea eratzeko eskrituraren eta bere estatutuen kopia konpultsatua edo lekukotza.

c) Sozietateko bazkideen zerrendaren eta partaidetza kuotaren ziurtagiria, organo eskudunak emanda, eta kapital sozialaren zifra.

d) Sozietatea Merkataritza Erregistroan izena emanda dagoela erakusten duen ziurtagiria.

e) Idatz-zati honetako a) hizkian aipatu diren pertsonen zigor-aurrekariei buruzko ziurtagiria, administrazio eskudunak egina.

f) a) idatz-zatian aipatzen diren pertsonak aurreko artikuluan ezarri diren ezgaitze kasuetan ez daudela erakusten duen adierazpena.

2.– Eskatzailea ez bada artean pertsona juridiko gisa eratu, artikulua honetan aipatzen den inskripzioa eska dezake, eskaerarekin batera eraketa eskrituraren proiektua eta estatutuak aurkeztuz. Kasu honetan, gehienez bi hilabeteko epea (izena emateko baimenetik aurrera zenbatuta) egongo da sozietatea legez eratzeko eta horren ziurtagiriak aurkezteko.

Proiektu horietan adierazten diren datuak lotesleak izango dira enpresa eskatzailearentzat. Eskritura publikoak bat etorri behar dira proiektuetan hartutako konpromisoekin, behar bezala frogatutako eta baimendutako salbuespenetan izan ezik.

3.– Artikulu honetako lehen idatz-zatiko a), e) eta f) hizkietan xedatutakoa bete behar dute pertsona fisikoek.

4.– Aurkeztutako eskaerak eta agiriek artikulua honetan azaldutako baldintzak betetzen dituztela egiaztatzen denean, Euskal Autonomia Erkidegoko Jokoaren Erregistro Nagusiko bingo-jokoko enpresen atalean inskribatuko eta baimenduko da, Joko eta Ikuskizunen zuzendariaren ebazpenaren bidez.

5.– Bingoaren enpresa titular izateko baimena jasotzean, bingo tradizionalaren jokoak ustiatzeko gaituta egongo da, beren beregi baimendutako lokaletako saletan, joko horien bestelako forma eta modalitateak ustiatzeko behar diren baimenak gorabehera.

**9. artikulua.**– Bingoan jokatzeko lokalak baimentzeko prozedura.

1.– Bingoan jokatzeko lokal bat instalatu gura duten pertsona fisiko edo juridikoek eskaera aurkeztu behar diote Joko eta Ikuskizunen Zuzendariari, Administrazio Publikoen Araubide Juridikoari eta Administrazio Prozedura Erkideari buruzko azaroaren 26ko 30/1992 Legearen 70. artikuluan ezarritakoa betez. Eskaerarekin batera agiri hauek aurkeztu behar dituzte:

a) Bingo-jokoaren enpresen atalean inskribatzeko ebazpenaren kopia, edo baimendutako inskripzio-zenbakia.

b) Lokaleko obren eta instalazioen oinarrizko proiektua, teknikari eskudun batek idatzita eta dagokion elkargo ofizialak onetsita. Hau izango da beraren edukia, gutxienez:

– Bingoan jokatzeko lokala jarri nahi den lokalaren planoak, 1/500 eskalan. Jokoretorako erabiltzen diren azalera, zerbitzu osagarriak eta bestelako dependentziak aipatu behar dira (atarreak, biltegia edo bulegoak).

– Suteen aurkako bitartekoen eta ebakuazio-bideen kokaera azaltzen duen planoak.

c) Teknikari eskudun batek eginiko ziurtagiria, indarrean dagoen arautegi aplikagarriak exijitzen dituen segurtasun neurriak betetzen direla ziurtatzen duena. Beren beregi adierazi behar dira egituraren sendotasuna, ebakuazio bideak eta larrialdietako seinaleak, suteen aurkako neurriak, instalazio elektrikoak eta hosgabetzea, eta larrialdi plan egokia edukitzea.

2.– Aurkeztutako eskaerak eta agiriak artikuluko honetan azaldutako baldintzak betetzen dituztela egiaztatzen denean, interesatuari jakinaraziko zaio, eta gehienez bi hilabeteko epean, ondorengo agiri hauek aurkezteko eskatu:

a) Lokalaren disponibilitatearen ziurtagiria.

b) Bingoan jokatzeko jarri nahi den lokalean jarduera egin daitekeelako agiria, dagokion udalak egina.

c) Teknikari eskudun batek eginiko ziurtagiria, artikuluko honetako 1. idatz-zatiko b) hizkian aipatzen den proiektua eta beraren azken burutzapena bat datozela adierazten duena. Beharrezkoa bada, organo eskudunak eskatuta hartu diren neurri zuzentzaileak adieraziko dira.

d) Fidantza jarri duelako ziurtagiria, bingoan jokatzeko lokalean egingo diren joko-modalitateen arabera, dagokion zenbatekoan, araudi honen 15. artikuluan xedatutakoarekin bat etorritik.

3.– Agiri hauek ez badira aurkezten artikuluko honetako 2. idatz-zatian ezarri den epean, espedientea iraungi eta artxibatu egingo da, eta interesatuari jakinarazi beharko zaio.

4.– Artikulu honetako 2. idatz-zatian aipatutako agiriak aurkeztu ostean, lokalaren instalazio eta funtzionamendurako baimena emango da, Joko eta Ikuskizunen zuzendariaren ebazpenaren bidez. Ebazpen horretan, bingoan

jokatzeko lokalaren kategoria eta baimendutako gehieneko edukiera azaldu behar dira gutxienez.

5.– Bingoan jokatzeko lokalaren baimena jaso arren, indarrean dagoen arautegiaren arabera eduki beharreko udal lizentziak ere jaso behar dira.

**10. artikulua.**– Bideragarritasunari buruzko alde zuzentzeko kontsulta.

1.– Bingoan jokatzeko lokal bat ustiatzeko interesa duen edozein pertsonak Joko eta Ikuskizun Zuzendaritzari galde diezaiolke lokala instalatzeko eta funtzionamenduan jartzeko baimenik jaso dezakeen.

2.– Horretarako, agiri hauek aurkeztu behar dira:

a) Eskatzailearen Nortasun Agiri Nazionalaren (edo baliokidearen) kopia.

b) Araudi honetako 9. artikuluko 1. idatz-zatiko b) hizkian aipatzen den oinarritzeko proiektua, obra eta instalazioei buruzkoa.

3.– Aurkeztutako agiriak aztertu ondoren, Joko eta Ikuskizun Zuzendaritzak gehienez hiru hilabeteko epean erantzun du baimena jasotzeko aukera dagoen edo ez. Ezezkoan, baimena jaso ahal izateko lokalean ezarri beharreko neurri zuzentzaileak zein diren jakinarazi dakiolke eskatzaileari.

4.– Kontsultari baiezko erantzuna emanaz gero, interesatuak baimen-espeditentzia hasten bada, ez ditu aurkeztu behar izango artikuluko 2. idatz-zatian aipatzen diren agiriak. Txostenean neurri zuzentzaileak ezarri beharra adierazten bada, interesatuak, espeditentzian, neurri zuzentzaileak ezarri dituela frogatu beharko du.

Idatz-zati honetan xedatutakoak ondorioak izan dituzan, lokala instalatzeko baimen-eskaera beranduenez 3 hilabeteko epean egin beharko da, interesatuak bideragarritasunari buruzko alde zuzentzeko kontsultaren erantzuna jasotzen duenetik zenbatuta.

5.– Bideragarritasunari buruzko alde zuzentzeko kontsultaren erantzunak ez du esan nahi, inola ere, kontsultaturiko lokala ustiatzeko administrazio baimena ematen denik. Baimen hori jasotzeko, araudi honetako 9. artikuluan ezarritako prozedura bete beharko da.

**11. artikulua.**– Bingo-jokorako lokaletan aldaketak egitea.

1.– Lokalaren konfigurazioan egiten diren aldaketek harrera-gelaren eta jokoretoaren azalerari buruzko ezer aldaraztea badakarte, Joko eta Ikuskizun Zuzendaritzak alde zuzentzeko baimendu beharko ditu aldaketak. Gainerako obrak Joko eta Ikuskizun Zuzendaritzari jakinarazi behar zaizkio egin aurretik.

2.– Bingo-lokalak beste lokal batera aldatzeko, instalaziorako eta funtzionamendurako beste baimen bat eman beharko du Joko eta Ikuskizunen zuzendariak.

**12. artikulua.**– Baimenen indarraldia.

Bingo-jokoko enpresen baimenen bidez, eta bingoan jokatzeko lokalen instalazioko eta funtzionamenduko baimenen bidez, interesatuei ahalmena ematen zaie araudi honetan araututako bingo-jokoaren modalitateak eta baimendutako bingo-lokalak ustiatzeko, bertan ezarritako baldintzen arabera. Baimen horiek bost urte iraungo dute, eta berriztatzeko modukoak izango dira.

**13. artikulua.**– Baimenak kentzea eta ezeztatzea.

1.– Aurreko artikuluan azaldutako inskripzioa eta baimenak kasu hauetan ken daitezke:

a) Interesatuak uko egiteagatik, Joko eta Ikuskizun Zuzendaritzari idatziz jakinarazita.

b) Enpresa legez edo borondatez desegiteagatik.

c) Baimenak balioa duen epea bukatu delako eta baimena berriztatzeko eskatu ez delako, administrazioak alde aurretik aginduta.

d) Bingo-jokoaren enpresen atalean, baimenen titularraren inskripzioa iraungi egin delako.

e) Indarrean dagoen araudiaren arabera eginiko administrazio prozedura batean, baimena ezeztatzeke ebazpena eman delako, kausa hauetan oinarriturik:

– Fidantza araudi honetako 15. artikuluan ezarritako epean birjartzen ez denean, baldin eta berme hori (edozein zio dela bide) gutxitu edo desagertu egin bada.

– Baimenak indarrean daudenean, titularrak edo lokalak baimena jasotzeko bete behar zituzten baldintza guztiak edo batzuk betetzeari uzten badiote.

– Baimenen titularrek, euren bazkideek edo euren administrazioek araudi honetan ezarritako preskripzioak betetzeari uzten badiote.

2.– Bingoan jokatzeko enpresetako baimenak inter vivos eskualdatu ezinak dira.

3.– Enpresako titularra, edo bazkide edo partaideren bat hilez gero, tramite egokiak egin beharko dira, zuzenbide pribatuak oinordetzei buruz ezartzen dituen arauak betez. Gero, eskubide-hartzaile edo kausahabenteak derrigorrezko administrazio baimenak eskatu beharko dizkio Joko eta Ikuskizun Zuzendaritzari.

**14. artikulua.**– Baimenak berriztatzea.

1.– Bingo-jokoko enpresen baimenak, eta bingoan jokatzeko lokalen instalazio eta funtzionamenduko baimenak bost urtetarako berrizta daitezke, indarrean dagoen arautegiaren arabera.

2.– Baimenak berriztatzeko eskaera, araudi honetan aipatua, Joko eta Ikuskizun Zuzendaritzan egingo da, baimena bukatu baino gutxienez bi hilabete lehenago.

3.– Enpresako baimenak berriztatzeko, araudi honetako 8. artikuluko 1. idatz-zatiko a), e eta f) hizkietan aipatutako agiriak aurkeztu behar ditu interesatuak, baimenaren titularrak diren pertsona fisikoei dagokienez, edo (titularrak pertsona juridikoak direnean), administrari, kontseilari eta bazkideei dagokienez.

4.– Lokalen baimenak berriztatzeko, araudi honetako 9. artikuluko 1. idatz-zatiko c) hizkian eta 2. idatz-zatiko a) hizkian aipatzen diren agiriak aurkeztu behar ditu interesatuak.

5.– Aurkeztutako agiriak ikusita, eta aurreko idatz-zatietan azaldutako baimenak betetzen direla egiaztatuta, egiaztapen egokiak egin ondoren, Joko eta Ikuskizun Zuzendaritzak berriztatzea bidezkoa den ala ez ebatziko du. Epe barruan ebazpenik ematen ez bada, berriztatzea onartu dela joko da.

#### **15. artikulua.**– Fidantzak.

1.– Bingoan jokatzeko lokalen titularrek fidantza egin behar dute, hurrengo idatz-zatietan xedatutakoaren arabera.

2.– Bingo tradizionala, bingo pilatua edo bingo eratorria izeneko aukerak ustiatzen dituztenek 18.000 euroko fidantza jarri behar dute bakoitzak. Araudi honetan xedatutakoaren itzalpean ezartzen diren administrazioko tasak eta zehapenak ordaintzeari, eta bingoko modalitate hauetako sariak ordaintzeari loturik egongo da fidantza hau.

3.– Interkonektatutako bingo pilatuaren modalitatea ustiatzen dutenek 10.000 euroko fidantza jarri beharko dute bakoitzak. Araudi honetan xedatutakoaren itzalpean ezartzen diren administrazioko tasak eta zehapenak ordaintzeari, eta bingo tradizionalako eta bingo eratorriko sariak (bingoko modalitate horiek ustiatzen badituzte) ordaintzeari loturik egongo da fidantza hau.

4.– Interkonektatutako bingo pilatuaren modalitate hau ustiatzeko, gainera, modalitate hau duten joko-areto guztiek baterako fidantza solidarioak egin beharko dute, 25.000 eurokoa. Fidantza hori interkonektatutako bingo pilatuko sariak eta sari «berezia» ordaintzeari loturik egongo da bakar-bakarrik.

5.– Fidantza eskudirutan edo bankuen, aurrezki kutxen, aseguru-erakundeen, kreditu-kooperatiben edo elkarren bermerako sozietateen abalez era daiteke. Euskal Autonomia Erkidegoko Administrazioaren alde egin behar da fidantza, eta sarien behartutako ordainketari loturik geratuko da.

6.– Edozer arrazoi dela bide fidantzaren zenbatekoa gutxitzen bada, fidantza jartzaileak falta den diru hori berriro jarri beharko du, hasierako zenbatekora iritsi arte, gehienez hilabeteko epean. Bermea birjartzen ez badu, ordea, inskripzioa edo baimena ezeztatu egingo da, araudi honetako 13. artikuluko e) idatz-zatian xedatutakoaren arabera.

7.– Administrazioak alde zuzenetik baimena ematen badu soilik berreskura daitezke fidantzak. Fidantza jartzeko arrazoiak desagertzen direnean eta bete gabeko betebeharrak ez dagoenean bakarrik baimenduko da fidantza kentzea.

#### **16. artikulua.**– Joko-makinak bingo-jokorako lokaletan.

Bingoan jokatzeko lokaletan, saria ematen duten "B" motako makinak jar daitezke. Euskal Autonomia Erkidegoko joko-aretoetako makinetarako finkatutako gehieneko zenbatekoa izango da saria. Lehen kategoriako

aretoetan, horrelako 8 makina jarri ahal izango dira gehienez, eta bigarren kategoriakoetan, 6.

### III. KAPITULUA

#### JENDEA ONARTZEA ETA SARRERA DEBEKATZEA

**17. artikulua.**– Bingo-aretoetan sartzeari debekaturik duten pertsonen zerrenda.

1.– Bingo-aretoetan sartzeari debekaturik duten pertsonen zerrenda bingoetan eta joko-kasinoetan sartzeari debekaturik dutenen zerrendako fitxategian dago. Joko eta Ikuskizun Zuzendaritzak eginiko agiria da. Bertan, hurrengo idatz-zatian azalduko diren irizpideen arabera, bingoan jokatzeko den aretoetan aldi batez sartu ezin diren pertsonak daude.

2.– Bingo-aretoetan sartzeari debekatuta duten pertsonen zerrendan honakoak sartuko ditu Joko eta Ikuskizun Zuzendaritzak:

a) Zerrendan egon nahi duten pertsonak, hiru hilabete eta bi urteko epean. Joko eta Ikuskizun Zuzendaritzari idazki bat bidaliz eskatu beharko dute zerrendan sartzeari. Zerrenda horretako gutxienezko egonaldia (hiru hilabete) bukatu ondoren, Joko eta Ikuskizun Zuzendaritzaren aurrean zerrendan egoteari uko egin diezaioke.

b) Bingo-jokoaren titular diren enpresek pertsona jakin batzuk zerrendan sartzeko eska dezakete, gutxienez hiru hilabetez eta gehienez urtebetez, baldin eta zioak arrazoitzen badituzte. Horretarako, administrazio espedientea izapidetuko da eta interesatuari hamar eguneko entzunaldia emango zaio.

Ondorio horietarako, jokoen ordena, lasaitasuna eta garapena eragozten dituzten ekintzak izango dira zio arrazoituak; esaterako: gainerako jokalariei jokoan parte hartzea eragozteko edo oztopatzea, bingoan langileenganako tratua ez adeitsua izatea eta jokoen arauak ez betetzea.

Zehapena mailakatzeko, nahita egitea, sortutako kaltea eta behin baino gehiagotan gertatzea kontuan izango dira.

c) Jokoa arautu zuen azaroaren 8ko 4/1991 Legeko xedapenen (edo hura garatzeko ematen diren araudien) urratze larri edo oso larriengatik zehatzen diren pertsonak.

3.– Bingo-aretoetan sartzeari debekatuta duten pertsonen zerrendan, dena delako pertsonaren izen-abizenak eta bere NANaren edo agiri baliokidearen zenbakia sartuko dira.

4.– Debekuaren lurralde-eremua Euskal Autonomia Erkidegoko lurralde historiko bateko edo gehiagotako joko-aretoetarako da, salbu eta artikuluko honetako 2. idatz-zatiko b) hizkian dagoen kasua, gaiak eragiten dien lokaletarako bakarrik izan daitekeena.

**18. artikulua.**– Sartzeko debekuen, murrizketen eta baldintzen araubidea.

1.– Bingoan jokatzeko lokaletan, honako hauei galaraziko zaie sartzeari: adingabeak; legez ezindutakoak; mozkorrak egoteagatik, substantzia psicotropikoen eraginpean egoteagatik edo adimeneko urripen edo nahasmendua izateagatik jarduteko gaitasun osoa ez dutenak; eta portaera erasokor edo bortitza izateagatik ordena, lasaitasuna eta jokoen garapena kaltetu ditzaketenak.

2.– Halaber, bingo-aretoetan sartzeari debekatuta duten pertsonen zerrendan dauden pertsonak, zerrendan ezarritako denboraldian, debekatuta izango dute bingo-jokorako aretoetan sartzeari.

3.– Bingoan jokatzeko lokaletako titularrek lokaletan sartzeko baldintza batzuk jar ditzakete jendearentzat oro har.

Bezeroak hartzeko eskubidea, betiere, diskriminazio ezeko printzipioa betez egingo da. Aplikazio laidagarri edo arbitrarioz ezin da inola ere erabili.

4.– Lokalean sartzeko debekuak, murrizpenak eta baldintzak lokaleko sarreretan ikusteko moduan adierazi behar dira.

**19. artikulua.**– Harrera, onartze eta kontrol sistema.

1.– Jokalariak onartzeko, bingo-lokal bakoitzean harrera-esparru bereizi bat jarri behar da. Esparru honen gutxieneko azalera aretorako baimendutako edukierako 15 pertsona bakoitzeko metro koadro 1 izan behar da.

2.– Halaber, bingoan jokatzeko aretoetan sartu gura duten pertsonen datuak egiaztatu ahal izateko sistema informatiko bat egon behar da, araudi honetako 17. artikulua bidez sartzeari debekaturik daukaten pertsonak sartzerik izan ez dezaten. Euskarri informatiko horrek Joko eta Ikuskizun Zuzendaritzarekin zuzeneko lotura izateko bide eman behar du, aipatutako zerrendan dauden pertsonak eguneratu ahal izateko, Joko eta Ikuskizun zuzendariaren ebazpenetan ezarritako zehaztapenen arabera.

Identifikazio sistema horren erabilera eta borondatezkoak diren bestelako erregistro-sistemen erabilera datu pertsonalak babesteko arautegiko preskripzioen pean egon behar da. Dena den, jendea onartzeko kontrolean edo (halakorik balego) erregistroan dauden datuak ezin izango dira erabili araudi honetan ezarritako xedeekin bat ez datozen helburuetarako.

3.– Sartzeko balizko debekuak egiaztatze, bingoan jokatzeko aretoan sartu gura duten pertsonen euren nortasuna frogatzen duen legezko agiria eskatuko zaie. Agiri horretan, pertsonaren izen-abizenak, jaiotze-data eta NANaren edo agiri baliokide baten zenbakia agertu behar dira.

**20. artikulua.**– Jokatzeko debekuak.

1.– Lokaletako akziodunek, partaideek, enpresako titularrek, langileek, zuzendaritzako kideek eta langileek, eta horien guztien ezkontideek, gurasoek eta seme-alabek ezin dute lokaletan baimendutako jokoen inola ere jokatu.

2.– Zerbitzu osagarriak (ostalaritza eta bestelakoak) ematen dituzten enpresetako langileek ere debeku bera izango dute, baina lan egiten duten lokalerako soilik.

#### IV. KAPITULUA

##### JOKO-ENPRESETAKO PARTAIDETZAREN MUGAK.

**21. artikulua.**– Joko-enpresetako partaidetzaren mugak.

1.– Pertsona fisiko edo juridiko batek ezin ditu eduki bingo-jokoaren hiru enpresa titular baino gehiagotako akzio edo partaidetzarik.

2.– Pertsona fisiko edo juridiko bat ezin da izan bingo-jokoko hiru lokal edo gehiagoren titular. Ondorio hauetarako, bingo-jokoko lokalaren titularra izango da pertsona juridiko titularrean akzio edo partaidetzen erdia baino gehiago dauzkan pertsona fisiko edo juridikoa.

3.– Azaldutako mugak bere izenean baina inoren interesetan diharduen pertsona bitartekariari ere badagozkie.

## V. KAPITULUA

### JOKOKO LANGILEAK

#### **22. artikulua.**– Baldintzak.

1.– Bingoan jokatzeko lokaletan jokoko langile izan gura duten pertsonak agiri profesional egokia eduki behar dute, euren kategoriari dagokiona. Agiri hori Joko eta Ikuskizun Zuzendaritzak ematen du. Eskaerarekin batera, agiri hauek aurkeztu behar dituzte:

- a) Nortasun Agiri Nazionalaren edo agiri baliokide baten fotokopia.
- b) Zigor-aurrekariaren ziurtagiria, Jokoa arautu zuen azaroaren 8ko 4/1991 Legearen 19. artikuluko 4. idatz-zatiko a) hizkian ezarritako kasuetan ez daudela frogatzeko.
- c) Joko eta Ikuskizun Zuzendaritzak emandako agiri normalizatu batean eginiko adierazpena. Bertan adierazi behar da aurreko bi urteetan eskatzailea ez dela ebazpen irmoz zehatua izan joko arautzen duten araudietan (Euskal Autonomia Erkidegoan nahiz estatuko gainerako lekuetan indarrean dagoena), hoben larri edo oso larriengatik.
- d) Eskatzaileak lan egingo duen bingoan jokatzeko lokalaren titularrak eginiko adostasun-ziurtagiria. Eskatzaileak izango duen kategoria eta lanpostua adierazi behar dira bertan.

2.– Eskaera eta aurreko idatz-zatian aipatzen diren agiriak aurkeztu ondoren, Joko eta Ikuskizun Zuzendaritzak egoki deritzen egiaztapenak egingo ditu eta gero agiri profesional hori emango du. Agiriak 3 urteko balioa izango du, eta 3 urtean behin berriztatu beharko da.

3.– Agiri profesional hau indargabetu edo ezeztatu egin daiteke, zehapen espedientearen instruitu ondoren, araudi honetan tipifikatutako urraketak egiteagatik. Halaber, agiri profesional honen titularrak agiria jasotzeko bete behar zituen legeko baldintzetakoren bat betetzeari uzten badio, ezeztatu egin daiteke, Joko eta Ikuskizun zuzendariaren ebazpen arrazoituaren bidez. Agiria indargabetu edo ezeztatuz gero, titularrak ezin izango du bere funtzioa bete, ebazpenaren adierazten den denbora-eremuan, Euskal Autonomia Erkidegoko bingo-lokaletan edo bestelako joko-lokaletan, lokal horietan jarduteko txartel profesionala behar baldin bada.

#### **23. artikulua.**– Kategoriak.

1.– Bingoan jokatzeko lokaletan, jokoko langileentzako kategoriak honakoak izango dira:

- a) "A" kategoria: Aretoko arduraduna eta mahaiko arduraduna
- b) "B" kategoria: Esatari/saltzailea eta jendea onartzeko langileak.

2.– Lanpostu bakoitzaren funtzioak hauek dira:

a) Aretoko arduradunak joko-aretoaren funtzionamendua antolatu eta kontrolatu behar du. Bere erantzukizuna izango da langile bakoitzak bere kategoriari dagozkion lanak egitea. Lokaleko gailu, instalazio eta zerbitzu guztien funtzionamendua egokia dela begiratuko du. Joko-aretoan ordena mantendu behar du, eta jokoa behar bezala egiten dela bermatu. Jokalarien eta agintaritzaren agenteen aurrean, baimenaren titularra den pertsona edo erakundearen ordezkaria bera izango da, salbu eta ordezkaritza hori beste pertsona batek badu eta joko-aretoan badago.

Ordena, lasaitasuna eta jokoen garapena nahasten dituzten pertsonen joko-aretotik irteteko agindu ahal izango die aretoko arduradunak. Gertaera hori (eta arazoa sortu duen pertsonaren izen-abizenak, ahal badu) akta liburuan adierazi behar ditu.

b) Mahaiko arduradunaren erantzukizuna izango da bolak eta txartelak egiaztatzea eta saltzaileei ematen zaizkiela bermatzea, jokaldi edo zozketa bakoitzean saldutako eta soberan geratutako txartelen kontabilitatea egiten dela bermatzea, eta lerroari eta bingoari dagozkion sariak zehatzen direla eta publikoari jakinarazten zaizkiola bermatzea. Beraren erantzukizuna izango dira honako hauek: txartelak salduz jasotzen den dirua biltzea, saritutako txartelak egiaztatzea eta sari bakoitzari dagozkion diru-zenbatekoak esatari-saltzaileari ematea, jende guztiari horren guztiaren berri ematea, eta akta-liburuan partida bakoitzeko akta idaztea.

c) Esatari-saltzaileak txartelak zuzenean salduko ditu. Diru-zenbateko hori bilduko du eta soberan geratu diren txartelekin batera mahaiko arduradunari emango dio. Bolak ateratzeko makina berak erabiliko du, eta bolen zenbakiak irakurriko ditu, irten ahala. Mahaiko arduradunari saritutako txartelak emango dizkio, egiazta ditzan. Jokalarietako lerroaren eta bingoaren diru-zenbatekoak emango dizkie. Erabilitako txartelak jasoko ditu, eta aretoko arduradunari eta mahaiko arduradunari lagundu egingo die, euren funtzioak hobeto betetzeko agintzen dizkieten lanetan.

d) Jendea onartzeko atean dauden langileek bingoan jokatzeko lokaleko bisitarien eta jokalarien sarrera kontrolatu behar dute. Sartu nahi duten pertsonen euren nortasuna frogatzen duen agiria erakusteko eskatu behar diete, eta araudi honetan azaldutako zioen batengatik sarrera debekaturik duten pertsonen sartzea galaraziko diete.

3.- Bingo-aretoetan nahitaezkoa izango da langileak egotea sarrera emateko zerbitzuaren eginkizunak betetzeko, erabiltzaileen sarrerak kontrolatzeko eta adingabeak eta legezko edozein egoeratik, Erregelamendu honen 17., 18, eta 19. artikuluetan aurreikusitakoaren arabera, debekatuta duten pertsonak sartzea eragozteko.

4.- Bingo-aretoetako langileen gainerako eginkizunak gauzatze aldera, neurriak hartu ahalko dira kontratatutako langileek eginkizunak aldi berean bete ditzaten, betiere jokalarien sarreraren kontrola eta partidak behar bezala egiten direla eta baimenaren enpresa titularrak administrazio-eginbehar guztiak betetzen dituela bermatzen bada

5.– ...

**24. artikulua.**– Borondatezko eskupekoak.

1.– Bingoan jokatzeko lokaleko jokoko edozein langileri, edozein kontzeptutan, bezeroak nahi duelako ematen dizkion borondatezko eskupeko guztiak kutxa bakar batean sartuko dira berehala. Kutxa mahaian egon behar da, erraz ikusten den leku batean. Borondatezko eskupekoak zaintzea aretoko arduradunaren erantzukizuna izango da.

2.– Borondatezko eskupekoak euren artean banatuko dituzte langileek, eurek ezarritako irizpideen arabera.

3.– Baimenaren titularra den pertsona edo erakundeak erabaki dezake aldi batez edo behin betiko borondatezko eskupekoak ez onartzea. Hori erabakitzekotan, argi jakinarazi beharko da, joko-areto sarreretan iragarkiak jarri.

## VI. KAPITULUA

### BINGOAN JOKATZEKO TXARTELAK

**25. artikulua.**– Jokorako txartelak.

1.– Bingo-jokoaren modalitate bakoitzeko txartel-ereduak fisikoak edo birtualak izan daitezke (hau da, bitarteko elektronikoko edo informatikoz erreproduzituak). Betiere, eredu guztiak Euskal Autonomia Erkidego osorako berberak izango dira. Erabili aurretik, Joko eta Ikuskizun Zuzendaritzak homologatu behar ditu.

2.– Bingoan jokatzeko lokaletan ageriko balioa 2 eurotik gorakoa izan behar da, jokoaren modalitate guztietan.

3.– Lokal horietan, balizko konbinazioen lote bakoitzeko txartel-kopurua 3.888 izango da. Hau ez da aplikatuko bingo eratorriaren jokoan.

4.– Bingo-jokoaren edozein modalitate garatzean, ezin dira joko-txartel berdin bi egon.

5.– Foru aldundiek bingoko txartel fisikoak adjudikatzeko ahalmena izango dute. Dena den, Euskal Autonomia Erkidego osorako txartel berdina egongo da, Herrizaingo sailburuaren aginduz onetsitako ereduaren arabera.

6.– Bingo-jokorako txartel fisikoak adjudikatzeko foru aldundiek ezartzen dituzten organoetan, Joko eta Ikuskizun Zuzendaritzak parte hartuko du.

7.– Halaber, lurralde historiko bakoitzeko foru diputazioek bingorako txartel fisikoak saltzeko ahalmena izango dute, zeinek bere lurralde-eremuan.

VII. KAPITULUA  
BINGO-JOKOAREN MODALITATEEN ARAUAK  
ETA GARAPENA  
1. ATALA  
OSAGAI KOMUNAK

**26. artikulua.**– Jokoaren osagaiak.

1.– Bingo-lokaletako joko-aretoetan honako osagaiak egon behar dira, gutxienez:

a) Bolak ateratzeko bi gailu.

b) Bi bola-sorta. Sorta bakoitzean laurogeita hamar bola egongo dira, eta bola bakoitzak dagokion zenbakia izango du idatzita azalera. Zenbakia ezabatzea ezinezkoa izan behar da, eta telebista-monitoreetatik ondo ikusteko modukoa izan behar da. Bolak narriatzen badira eta horren ondorioz ezin bada bermatu jokoa behar bezala egingo dela, bola-sorta ordezkatu egingo da. Bolak, betiere, 2.500 partida eta gero ordezkatu egin behar dira.

c) Kontrol-mahai bat. Bertan, mahaiko arduradunaren eta esatari-saltzailearen funtzioak beteko dira.

d) Partidetako aktak egiteko sistema informatiko bat.

e) Megafonia-sistema bat, jokalarari guztiek jokoaren garapena eta informazioa ondo entzuteko modukoa.

f) Telebistako zirkuitu itxi bat, bolak nola ateratzen diren erakusteko, aretoko edozein lekutatik ikusten dena.

g) Informazio-panelak, joko-aretoaren azaleraren arabera. Haietan, atera diren bola guztiak erregistratuko dira, atera diren ordenaren arabera zenbaki bat emanaz. Halaber, lerroko eta bingoko sarien banaketa, eta joko-modalitate bakoitzeko sarien diru-zenbatekoak adierazi behar dira panel horietan. Informazioa joko-aretoan edozein lekutatik ikusteko modukoa izan behar da.

2.– Bingo-jokoaren garapenari buruzko informazio guztia Euskal Autonomia Erkidegoko bi hizkuntza ofizialetan eman behar da, bingo-aretoan informazio-paneletan.

**27. artikulua.**– Garapena eta arauak.

1.– Mahaiko arduradunak saldutako txartel guztiak eta sarietarako diru-zenbatekoa jakinarazten dituen hasiko da partida. Saritutako txartel bat, gutxienez, egiaztatzen bukatzean amaituko da. Bingoko saio bakoitza hastean eta bukatzean, mahaiko arduradunak bolak zenbatuko ditu, haien egoera eta zenbakiak egiaztatuz.

2.– Partida batean, lehenengo bola atera aurretik, gailu edo instalazioetan matxurarik edo akatsik gertatzen bada, edo jokoa jarraitzeko gorabeherarik gertatzen bada, partida behin-behinean etengo da.

Hamabost minututan ezin bada arazo hori konpondu, jokalariei txartelen zenbateko osoa itzuliko zaie, eta txartelok kontrol-mahaian utzi beharko dira.

Bolak ateratzen eta txarteletan idazten hasi bada, partidak aurrera jarraituko du, bolak eskuz atereaz, baldin eta aleatoriotasuna bermatu ahal bada, eta ateratzeko dauden zenbakiak bakarrik erabiliz.

3.– Sarietakoren batean konbinazio irabazle bat baino gehiago badago, sari bakoitzeko zenbatekoa saria aldarrikatu duten jokalarien artean banatuko da. Mahaiko arduradunak partida ixten duenean ezin da inola ere saririk erreklamatu.

4.– Bingo-jokoaren modalitate hauetako edozeinetako partida batean, ezin izango da jokalaria berririk aretoan sartu, partida bukatu arte.

**28. artikulua.**– Joko-txartelen salmenta eta erabilera.

1.– Jokorako txartel fisikoak dagokien modalitatea jokatzen den aretoan bakarrik saldu ahal zaizkie jokalariei. Mahaiko arduradunak aurreko partidatan bingo saria duen (izatekotan) txartel bat gutxienez egiaztatzen duen unetik aurrera hasiko da txartelen salmenta.

2.– Partida bakoitzeko salmenta serie bakoitzeko lehenengo zenbakiarekin hasiko da, seriea hasten denean, edo aurreko edozein partidatan (egun berean edo beste batean) saldu den azken zenbakitik aurrera. Partida bakoitzean saldutako txartelak elkarren segidakoak izan behar dira, euren hurrenkera-zenbakiaren arabera, serie bakoitzaren barruan.

3.– Txartel akastunak aldeztu aurretik kenduko dira eta serie osoak eta isolatuak jarriko dira haien ordeztu. Kasu horretan, mahaiko arduradunak publikoari horren berri emango die, eta akta-liburuan agerraraziko du txartel akastunak baztertu egin direla.

4.– Salgai jarri den serieko txartel-kopurua ez bada nahikoa jokalarien eskariari aurre egiteko, partida bererako serie berri baten txartelak sal daitezke, baldintza hauek betetzen badira:

a) Bigarren serie osagarri hori lehenengoaren ageriko balio berekoa izan behar da.

b) Bigarren seriea bat zenbakitik aurrera, edo aurreko serietik saldu den zenbakiaren hurrengotik aurrera hasi behar da saltzen.

c) Bigarren serieko txartelak, salmenta hasi zeneko lehen serieko txarteleraino sal daitezke. Horrela, partida berean ezin izango dira txartel berdin bi saldu.

5.– Txartelak erosi eta edukitzeagatik, jokalariek eskubidea dute partida indarrean dauden arauak betez egin dadin eta, egotekotan, ezarritako sariak ordain daitezken edo (bidezkoa denean) ordaindutako diru guztia osorik itzul dakien. Jokalaria partida bukatu aurretik joaten bada, ez du izango ordaindu duen txartelaren prezioa berreskuratzeko eskubiderik. Halere, nahi badu, beste jokalaria bati transferitu diezaioke txartela.

6.– Jokalariek eskudirutan edo Joko eta Ikuskizun Zuzendaritzak onartutako beste ordainketa-bide batzuk erabiliz ordaindu behar dituzte txartelak. Ezin da egin jokalariei kreditua emateko operaziorik.

7.– Saritutako txartelak telebistako zirkuituaren bidez egiaztatuko dira: mahaiko arduradunak saritutako zenbakiak irakurriko ditu, eta txartelaren matrizea erakutsiko da.

8.– Partida bakoitzaren ostean, saritutako txartelak eta urraketa edo erreklamazioa ekar ditzaketenak kendu beharko dira.

9.– Txartel fisikoak, edozein ageriko balio dutela ere, lurralde historikoetako foru aldundietan truka daitezke, balio handiago edo gutxiagokoekin, eta diru-zenbateko berarekin.

### **29. artikulua.- Sarien ordainketa.**

1.- Sariak esku-dirutan ordainduko zaizkie jokalariei edo, ezin bada, txeke adostuaren bidez, jokalaria alde aurretik ados agertzen bada.

2.- Sariak partida bakoitzaren bukaeran ordainduko dira, saridun txartelak jaso eta egiaztatu ondoren. Txartelok osorik aurkeztu behar dira, zalantza sor dezakeen manipulaziorik gabe. Txartel horiek Joko eta Ikuskizun Zuzendaritzak eskatu ahalko dituzte, hilabete bateko epean.

3.- Saria ordaintzen ez bada, jokariak enpresak eginiko fidantza atxikitze eskatu ahalko dio Joko eta Ikuskizun Zuzendaritzari, idatziz, saria kobratzeko.

4.- Partida bakoitzean kartoiak salduz biltzen den diruaren zati bat sariak ordaintzeko izango da. Diru hori, Herrizaingoko sailburuaren agindu batean ezarritako ehunekoa aplikatuz kalkulatu da, eta berariazko arauetan bildutako joko-modalitateen arabera banatuko da.

## 2. ATALA

### BINGO TRADIZIONALA

### **30. artikulua.– Definizioa.**

1.– Bingo tradizionalan laurogeita hamar zenbakirekin jokaten da, bat eta laurogeita hamar barne, eta hauek txarteletan agertuko dira. Txartelak, bada, hamabost zenbaki ezberdinez osatuko dira eta honako egitura izango dute: hiru lerro horizontal, bakoitzean bost zenbakirekin, eta bederatzi zutabe bertikal, hiru, bi edo zenbaki batekin horietariko bakoitzean, baina zutabe guztiek beti izanik zenbakiren bat. Hurrengo konbinazioak sarituko dira:

a) Lerroa: Lerroa egingo da bera osatzen duten zenbaki guztiak atera direnean, baldin eta aurreko zenbakiak ateratzean beste jokalariren batek lerroa egin duela esan eta hori zuzentzat eman ez bada. Joko-txarteletako hiru lerroetako edozein izan daiteke: goikoa, erdiko edo behekoa.

b) Bingoa: Bingoa egingo da joko-txarteletako hamabost zenbakiak atera direnean.

2.– Aurreko atalean ezarritakoa kontuan hartuta eta garatzeko araudiarekin bat etorriz, bingo-jokoan txartel fisikoen ordez horien erreproduzio elektronikoa edo informatikoa erabili ahal izango dira; horretarako, Joko eta Ikuskizun Zuzendaritzak homologatutako materialak eta sistema informatikoa erabili beharko dira.

### **31. artikulua.– Sarien banaketa**

Bingo tradizionaleko partida bakoitzean banatuko den saria hauxe izango da: partidari saldu diren txartelen ageriko balioaren ehunekoak, Herrizaingoko sailburuak araudi hau garatzeko emango duen agindu bidez zehazten direnak.

### 3. ATALA BINGO PILATUA

#### **32. artikulua.**– Definizioa.

1.– Bingo pilatua bingoaren modalitate bat da. Bertan, bingo tradizionalan irabazi duen jokalaria gehienez 18.000 euro gehiago eskuratu ahal izango ditu, baldin eta saria lortu arte atera den bola kopuruak baimendutako gehieneko kopurua gainditzen ez badu.

2.– Bingo pilatua, interkonektatutako bingo pilatua eta sari "berezia" bateraezinak dira.

3.– Partida bakoitzean baimendutako gehieneko bola kopurua ezarriko da, saldu den txartel kopuruaren arabera eta hurrengo eskala jarraituz:

#### SALDUTAKO TXARTELAK BAIMEN. GEHIENKO BOLA KOPURUA

1-50 txartel 45 edo gutxiago

51-100 txartel 44 edo gutxiago

101-150 txartel 42 edo gutxiago

151-200 txartel 41 edo gutxiago

200etik gora 40 edo gutxiago

#### **33. artikulua.**– Sarien banaketa.

1.- Bingo pilatuaren saria, Herrizaingoko sailburuak araudi hau garatzeko emango duen agindu bidez zehazten den txartelaren ageriko balioaren ehunekoa izango da. Zenbateko hori partida bakoitzean deskontatuko da bingorako ehunekotik, eta bingo pilatuaren saria lortuko den partidara arte pilatzen joango da.

2.- Bingo pilatuaren sarirako metatzen joan den zenbatekotik, Herrizaingoko sailburuak araudi hau garatzeko emango duen agindu bidez ezartzen den ehunekoa deskontatuko da, saria ematen denean. Zenbateko hori, erreserba-bingo moduan, bingo pilatuaren hasierako kopurua izango da eta hurrengo partidari lortutakoari gehituko zaio. Herrizaingoko sailburuaren agindu bidez ezarriko da irabazle gertatzen den erabiltzaileari edo erabiltzaileei eman beharreko ehunekoa.

#### **34. artikulua.**– Bingo pilatuaren jokorako elementuak.

26. artikuluan aipatutakoaz gain, joko-modalitate hau egiten den lokaletako informazio-paneletan ikusteko moduan azaldu beharko dira bolak ateratzeko ordena-zenbakia (pilatutako saria lortzeko baliagarria izango dena), eskaintzen den saria eta horren erreserba.

#### **35. artikulua.**– Eskabidea

Bingo pilatua modalitatea ustiatu nahi duten bingo-jokoaren enpresa titularrek idatzizko eskabidea egin beharko diote Joko eta Ikuskizun Zuzendaritzari.

#### 4. ATALA

### INTERKONEKTATUTAKO BINGO PILATUA ETA SARI "BEREZIA"

#### **36. artikulua.**– Definizioa.

Interkonektatutako bingo pilatua bingoaren modalitate bat da. Bertan, lokal ezberdinetako jokalariek parte hartzen dute sistema informatiko baten bidez elkarren artean konektatuta. Modalitate honetan, bingo tradizionalako irabazleak edo irabazleek sari gehigarria lortzeko aukera izango du/dute, baldin eta saria lortu arte atera den bola kopuruak baimendutako gehieneko kopurua gainditzen ez badu.

#### **37. artikulua.**– Sarien banaketa.

1.- Partida bakoitzean banatuko den saria hauxe izango da: partidari saldu diren txartelen ageriko balioaren ehunekoak, Herrizaingoko sailburuak araudi hau garatzeko emango duen agindu bidez zehazten direnak.

2.- Sari bereziaren zenbatekoa hauxe izango da: joko-modalitate hau duen lokal bakoitzean jokatu diren txartelen ehunekoak pilatzean lortutakoa. Herrizaingoko sailburuaren agindu bidez ezarriko da.

Interkonektatutako bingo pilatuari dagokion kopurua, bingo-joko tradizionalan aritzeko sariaren ehunetik kenduko da partida bakoitzean; gehienez ere 25.000 euro pilatuko dira.

3.- Aurreko paragrafoan aurreikusitako gehieneko kopurua lortuz gero, hor aipatzen den kentze-ehunekoak ohiko bingoaren sarirako erabiliko da.

4.- Ateratzeko ordenaren arabera, hogeita hamaseigarren bola da interkonektatutako bingo pilatua lortzeko gehieneko bola. Gehieneko kopurura heltzen denean, saria lortu arte egun bakoitzeko bola bat gehiago izango da.

#### **38. artikulua.**– Joko-arau bereziak.

1.– Lehenengo partidaren hasieran, mahaiko arduradunak megafoniaz azaldu beharko die bingo-jokorako lokalean dauden jokalariei zein den pilatu den zenbatekoa eta zein izango den hori lortzeko azken bola, betiere interkonektatutako bingo pilatuari dagokionez.

2.– Sariaren egiaztapena bingo tradizionalerako ezarritako moduan egingo da. Nolanahi ere, norbaitek saria lortu duenean, aretoko arduradunak lokalean dauden jokalariei guztien aurrean egiaztatuko du irabazlearen zenbakiak bolak ateratzen dituen makinatik irtendakoekin bat datozeela.

3.– Mahaiko arduradunak atal honetan ezarritako moduan jardun dela jasotzen duen akta sinatuko du, eta aretoko arduradunak akta ontzat emango du.

4.– Partida bukatzean, sarituak izan diren txartelak monitoreetan erakutsiko dira, matrize eran, egiaztatutako izateko.

5.– Interkonektatutako bingo pilatuaren sariaren zenbatekoa ez da aldatuko saio osoan zehar, sistemara atxikitako bingoan jokatzeko lokal guztietan.

6.– Saio berean saritu diren bingoak horien irabazleen artean banatuko dira. Sariak lortu eta hurrengo berrogeita zortzi orduen barruan emango dira, irabazleak egiaztatu ondoren.

7.– Saria egiaztatu eta gero, irabazleari edo irabazleei frogagiri bat emango zaio/zaie saioaren eguna, partidaren zenbakia eta saio berean egon den irabazle kopurua kontuan hartuta jasoko den saria adieraziz. Datu horiek guztiak Akten Liburuan jasoko dira, beste hauekin batera: aipatu sariaren irabazleari edo irabazleei buruzko datu guztiak, bere nortasun-agiri nazionalaren zenbakia edo horren baliokidea eta sinadura.

**39. artikulua.**– Datuak prozesatzeko Unitate Zentrala.

1.– Bingoan jokatzeko lokalak datuak prozesatzeko unitate zentralera konektatuta egongo dira; izan ere, saio bakoitza bukatzen denean eta hurrengoa hasi baino lehen, sistemara atxikitako bingoan jokatzeko lokaletan saldu diren txartelen zenbateko osoa aipatu unitatera bidaliko da, eta baita hala dagokionean, eman diren sariak ere.

2.– Arestian aipatutako datuak prozesatu ondoren, bingoan jokatzeko lokal bakoitzari bidaliko zaizkio eta, horrela, hurrengo saioari ekiteko interkonektatutako bingo pilatuaren zenbatekoa zein den zehaztuko da. Edozelan ere, informazioa lokal bakoitzetik datuak prozesatzeko unitate zentralera bidaltzea bermatuko da.

3.– Datuak prozesatzeko unitate zentrala bingoak ordezkatzeko dituen enpresarien elkartearen egoitzetan kokatuko da; baina unitate hori, edozein arrazoi dela medio, zerbitzuetik kanpo gelditzen denerako horren ordezkotzat ere egon beharko da.

4.– Joko-modalitate hori egiteko elementu tekniko eta informatikoak behar bezala zigaratu dira, beste inor horiekin ibili ez dadin.

**40. artikulua.**– Titulartasuna aldatzea.

1.– Sistemara atxikitako bingoan jokatzeko lokalaren titulartasuna aldatuz gero, titular berriaren eskubide eta betebeharrak guztiak subrogatuko dira.

2.– Edozein arrazoi dela medio joko-modalitate horri uko egiten dioten bingoan jokatzeko lokalek, ezin izango dute interkonektatutako bingo pilatura atxikitze eskabidea egin harik eta uko egin zenetik urtebete igaro arte.

3.– Interkonektatutako bingo pilatuaren modalitateara atxikita dagoen bingoan jokatzeko lokalen bat, edozein arrazoi dela medio, ixteak edo horrek uko egiteak ez dakar jabe-eskubiderik ezta une horretan pilatuta dauden zenbatekoak itzultzerik ere.

**41. artikulua.**– Sari "berezia".

1.- Sari berezia interkonektatutako bingo pilatuarekin batera jokatzen da. Joko horretan, bingo tradizionalekoaz gain, sari gehigarria lortuko da modalitate hori duten bingoan jokatzeko lokaletan, ateratzeko ordenaren arabera izan den bola-zenbakia kontuan hartuta eta artikuluko 5. zenbakian xedatutakoarekin bat etorritik.

2.- Sari bereziaren zenbatekoa hauxe izango da: joko-modalitate hau duen lokal bakoitzean jokatu diren txartelen ageriko balio osoaren ehuneko pilatzean lortutakoa. Herrizaingoko sailburuaren agindu bidez ezarriko da.

3.- Jokalariak sari berezia irabazteko aukera izango dute, artikuluko honetan ezartzen den eskalaren arabera, saria aipatu zenbatekora heltzen denean.

Behin sari bereziaren kopurura iritsita, aipatutako ehunekoa kentzen jarraituko da; diru hori erreserba berezirako gordeko da, eta erreserba hori hasierako dotaziora eramango da, aurreko sari berezia ordaindu ondoren.

4.- Ateratzeko ordenaren arabera, sari berezia lortzeko azken bola berrogeita seigarrena izango da, berau barne. Dena den, sari bereziaren zenbatekora heldu baina aurreko puntuan ezarritako azken bolarekin jokalaria batek ere ez badu saria lortu, egingo den partida bakoitzeko bola bat gehiago aterako da, sari berezia eman arte.

5.- Konbinazio irabazle bat baino gehiago badago, saria irabazle guztien artean banatuko da.

6.- Sari bereziaren zenbatekoa zein izango den zehazteko, bingo-aretoek Foru Aldundiei urtean egindako erosketak hartuko dira kontuan, hain zuzen, puntu honetako erosketa-eskala aplikatzen den ekitaldiaren aurreko urteko abenduaren 31n egindakoak.

Sari bereziaren gutxieneko eta gehieneko zenbatekoak, urtean egindako erosketen arabera:

#### URTEKO EROSKETAK SARI BEREZIAK

4.000.000 eurora bitartekoak 100 euro - 1.000 euro

4.000.001 eurotik 8.000.000 eurora bitartekoak 200 euro - 1.000 euro

8.000.001 eurotik 16.000.000 eurora bitartekoak 350 euro - 1.000 euro

16.000.000 eurotik gorakoak 500 euro - 1.000 euro

Sarien eskala 50 euroko zatikitan handitu ahal izango da, salmenta-tarte bakoitzaren arabera.

7.- Bingo-areto bakoitzak, saio berean, dituen sari berezietako edozein eskaini ahal izango die jokalariei, baldin eta une bakoitzean ezarritako saria eman bada.

8.- Mahaiko arduradunak, egun bakoitzeko saioa hastean, sari bereziaren zenbatekoa eta hori lortzeko bola ateratzeko ordena zein diren jakinaraziko du. Halaber, sariaren zenbatekoa aldatuz gero, horri dagokion partida hasi baino lehen jakinaraziko du.

Era berean, sari berezirik dagoen eta bola ateratzeko ordena zein izango den esango du dagokion partida baino lehen eta saria eman arte.

#### **42. artikulua.**– Eskabidea.

1.- Joko-modalitate hau eduki nahi duten enpresek idazki bat bidali beharko dute Joko eta Ikuskizun Zuzendaritzara eta, horrekin batera, aurreko ekitaldiko salmenten bolumenari buruzko dagokion Foru Aldundiaren ziurtagiria ere bidaliko dute. Joko eta Ikuskizun Zuzendaritzan aurkeztu den dokumentazioa aztertu ondoren, Araudi honetan ezartzen diren betekizunekin bat etorritz, baimena emango da (hala badagokio). Eskabidea, gainera, enpresarien elkarteak ere aurkeztu ahal izango du berak ordezkatzan dituen bingo-areto guztien izenean.

2.- Baimenak, ematen den urte naturaleko indarraldia izango du, eta besterik gabe berritu ahal izango da.

3.- Baimendutako enpresak urtero-urtero egokitu beharko dira aurreko ekitaldiko salmenta-kopuruaren arabera dagokien eskalera, araudi honen 41.6 artikuluan ezarritakoari jarraiki. Horretarako, hala jakinarazi beharko diote Joko eta Ikuskizun Zuzendaritzari, ondorioak izatea nahi den ekitaldiko urtarilaren 15a baino lehen. Halaber, aurreko urteko abenduaren 31n izandako salmenten bolumenaren ziurtagiria ere bidaliko dute. Joko eta Ikuskizun Zuzendaritzak horren gainean berariazko ebazpenik eman ez badu egutegiko hamar eguneko epean, eskala berrian sartzeko baimena ematen dela ulertuko da.

4.- Nolanahi ere, baimendutako enpresek sari bereziaren gutxieneko eta gehieneko zenbatekoak aldatzeko eskatu dezakete, betiere araudi honetako 41.6 artikuluko eskalaren arabera, eta eskaera-egunaren aurreko hiruhilabetean izandako eraketak erreferentziazat harturik.

Salmentak zehazteko, urte osoa hartuko da aintzat, eta kasuan kasuko hiruhilabeteari dagokion proportzioa kalkulatu da.

Eskaerarekin batera, interesdunak dagokion foru aldundiaren egiaztagiriak aurkeztuko ditu. Joko eta Ikuskizun Zuzendaritzak horren gainean berariazko ebazpenik eman ez badu hamar egun naturaleko epean eskaera egiten den egunetik hasita, sari bereziaren gutxieneko eta gehieneko zenbatekoak eskala berriaren arabera aldatzeko baimena ematen duela ulertuko da

#### **43. artikulua.**– Alta eta bajak.

1.– Joko-modalitate honetan alta emanda gero modalitate hori kendu nahi duen enpresak idazki bat bidali beharko dio Joko eta Ikuskizun zuzendariari. Bada, pilatzen egon den sari "berezia" ematen den unean lortuko du baja.

2.– Modalitate horretan baja eman denean, enpresak ezin izango du berriz modalitate hori eskatu harik eta horretatik kanpo uzteko idazkia aurkeztu zenetik sei hilabete igaro arte.

#### **44. artikulua.**– Pilatutako zenbatekoak, bingo-aretoa ixten denean.

Edozein arrazoi dela medio bingo-aretoa ixten bada, sari "berezia" ordaintzeko pilatu diren zenbatekoak Herrizaingo Sailaren esku utziko dira, honek Euskal Autonomia Erkidegoko Diruzaintza Nagusian sar ditzan.

### 5. ATALA

#### BINGO ERATORRIA

#### **45. artikulua.**– Definizioa.

1.– Bingo eratorria bingoaren modalitate bat da. 90 eta 6 bitarteko zenbakiekin jokutzen da, txartel fisiko edo birtualen bidez. Txarteletan gutxienez 6 eta gehienez 18 zenbaki ageri dira, denak ezberdinak eta lerro edo zutabetan banatuta, Atal honetan ezartzen diren preskripzioekin bat etorriz.

2.– Joko horretako sari edo konbinazio irabazle mota ezberdinak eta horien zenbatekoak (ehunekoak edo zenbatekoa emanez) joko hasi baino lehen zehaztuko dira. Horrela, aldeztu aurretik zehaztutako zenbaki-konbinazioa osatzean lortuko da saria.

3.– Bingo eratorriaren bertsio ezberdinak baimentzeko, oinarritzko baldintzak betetzen direla egiaztatzea beharko da, betiere Araudi honetan aurreikusitako prozeduraren arabera.

4.– Bingo eratorria, eta horren bertsioak, aldez aurretik homologatuak izan diren sistema informatikoen bidez ere jokatu ahal izango dira, baldin eta programek atal honetako arau orokorrak betetzen badituzte.

**46. artikulua.**– Bingo eratorriaren bertsioak.

1.– Bingo eratorriaren bertsioak ondokoak dira:

a) Zuzena: joko honetan sariak zuzeneko jokaldian bertan zehazten dira, kontuan hartu gabe jokoan izan den apustu kopurua.

b) Diferitua: joko honetan sariaren zenbatekoa finkoa da eta partidek iraupen jakin bat izaten dute, saldu den txartel kopuruaren edo egin den apustu kopuruaren arabera.

2.– Bingo eratorrian, jokoari buruzko datuak fidagarriak direla eta jokia nolakoa izan agintzen duten baldintzak betetzen direla bermatuko duen euskarri teknikoa egongo da.

3.– Bingo eratorriaren edozein bertsiotan sarietarako gordetzen den ehunekoia jokatu den diru kopuruaren %70ekoa izango da gutxienez; gainera, modalitate bakoitzean dauden sarietarako zein ehuneko eman den ere zehaztu beharko da.

4.– Jokorako txartel birtualak erabiltzen direnean honakoak bermatu beharko dira: jokoaren kontrola eta kontabilitatea, segurtasuna eta egin diren eragiketa guztien erregistroa.

**47. artikulua.**– Agiriak.

1.– Bingo eratorrira jokatu ahal izateko Joko eta Ikuskizun Zuzendaritzaren baimena eduki behar da, eta horretarako ondoko agiriak aurkeztu behar dira:

a) Deskripzio-memoria. Bertan, honakoak jasoko dira: jokoaren funtzionamendu-arauak, emandako sariak, sariak emateko baldintzak, sarietarako gordetzen den ehuneko osoa, eta sariak kategoriatan ezberdinetan duten banaketa.

b) Zuritzeko memoria teknikoa. Bertan, honakoa zuritu beharko da: jokia eta horren funtzionamendua atal honetan bingo-jokorako ezartzen diren ezaugarri orokorrekin bat datoze eta, teknikoki, baldintza horiek betetzen dituztela. Bertsio diferituaren kasuan, modalitate honetarako aurreikusi diren baldintza orokorrak bete ahal izateko erabiliko diren kalkulu tekniko justifikatuak eta iraupena zehaztuko dira.

c) Memoria teknikoa. Bertan, jokorako eta horren kontrolerako izango den euskarri teknikoa zehaztu eta deskribatuko da, jokoaren fidagarritasuna eta gardentasuna une oro bermatuko duten segurtasun-mailak ere zehaztuz.

2.– Aurreko puntuko b) eta c) letretan ezartzen diren baldintzak eskumena duen teknikari batek sinatuta eta dagokion Elkargoak ikus-onetsita egongo dira. Administrazioak sistemaren funtzionalitatea eta jokoaren fidagarritasuna egiaztatzeko eta jokia aurkeztu diren agiriekin bat datorrela bermatzeko bidezkoztat jotzen dituen alde aurreko probak egingo ditu.

## VIII. KAPITULUA

### BINGO-JOKOAREN ERAGIKETEN

## ETA ERREKLAMAZIOEN ERREGISTROA

### **48. artikulua.**– Akten Liburuan erregistratzea.

1.– Saio bakoitza akta batean geratuko da jasota, saioko partida guztiak azalduz. Partida egin eta aldi berean idatziko da aktan; horrela, aktan beharrezko datuak idatzi arte ezin izango da bolarik atera.

2.– Aktak azala izango du eta zenbakituta emango da. Halaber, Joko eta Ikuskizun Zuzendaritzak zigilatu eta izapidetuko du.

3.– Aktan saioaren hasierarako izapideak, eguna, ordua eta mahaiko arduradunaren sinadura jaso beharko dira; gero, partida bakoitzari buruzko hurrengo datuak eman beharko dira: partidaren ordena-zenbakia, seriea edo serieak, prezioa eta saldu den txartel kopurua, bildu den diru-kopurua, lerro eta bingoetan ordaindu diren zenbatekoak, eta modalitate bakoitzean izan diren sariak. Saioa bukatzean itxiera-izapidea egingo da, idatzi den ordua eta mahaiko arduradunaren sinadura emanez.

4.– Joko eta Ikuskizun Zuzendaritzak alde aurretik homologatuz gero, artikulua honetan aipatzen diren Akten Liburuen orde formatu, eduki eta baldintza berberak dituen euskarri informatikoa eman ahal izango da.

### **49. artikulua.**– Erreklamazioen liburua.

1.– Joko eta Ikuskizun Zuzendaritzak zigilatu eta izapidetutako Erreklamazioen Liburua egongo da jokalariek, nahi izanez gero, erabil dezaten. Erreklamazioan honakoak agertu beharko dira: erreklamatzaillearen datuak, bere nortasun-agiri nazionalaren zenbakia edo horren baliokidea eta egitateen azalpen laburra. Erreklamazioa, halaber, erreklamatzailleak eta aretoko arduradunak sinatu beharko dute.

2.– Liburu horretan, bingo-enpresek partidetan izan diren gorabehera nagusienak jasoko dituzte, hala nola: etenaldiak, hutsak edo sistema teknikoen matxurak.

## IX. KAPITULUA

### BINGO-JOKOAREN MAKINA LAGUNTZAILEAK

### **50. artikulua.**– Bingo-jokoaren makina laguntzaileak.

1.– Bingo-jokoan, edozein dela horren modalitatea, jokorako makina laguntzaileak erabili ahal izango dira. Makina horiek bingoan jokatzeko lokaletan dagoen kontrol-mahaira konektatuta egongo dira eta txartel fisikoen orde erabili ahal izango dira.

2.– Bingo-jokorako makina laguntzaileak erabiltzeko, Joko eta Ikuskizun Zuzendaritzak alde aurretik homologatu eta baimendu beharko ditu.

### **51. artikulua.**– Makina laguntzaileen gehieneko kopurua.

1.– Areto bakoitzean gehienez ere egongo den makina laguntzaileak ondorengoak izango da:

a) 1. kategoriako aretoetan:.... 24 makina.

b) 2. kategoriako aretoetan:.... 18 makina.

2.– Partida batean, makina eta jokalarari bakoitzeko gehienez 6 serie eta serie bakoitzean 6 kartoi jokatu ahal izango dira.

3.– Makina laguntzaileetan, jokatu diren txartelen identifikazioa ikusteko moduan egongo da, txartelen seriea eta zenbakia azalduz eta partida bakoitzean jokatu diren txartelak zein diren adieraziz.

## X. KAPITULUA

### JOKALARIARENTZAKO INFORMAZIOA

**52. artikulua.**– Jokalariarentzako informazioa.

Bingoan jokatzeko lokaletan, bingo-jokoaren modalitate guztiei buruzko arauak egon beharko dira jokalarien esku. Arauok, gainera, Euskal Autonomia Erkidegoko bi hizkuntza ofizialetan idatzita egongo dira. Halaber, lokal horietako titularrek aipatu joko-modalitateetako arau ofizialak jokalarien esku eduki behar izango dituzte.

## XI. KAPITULUA

### ERROTULU ADIERAZLEAK ETA SUSTAPEN JARDUERAK

**53. artikulua.**– Errotulu adierazleak.

1.– Eraikinaren fatxadan edo bingoan jokatzeko lokala dagoen hirigintza-barrutiaren sarreran soilik jar daitezke errotuluak. Hauetan lokalaren anagrama eta merkataritzako izena adieraziko dira. Lokalean egon daitezkeen beste zerbitzu batzuei buruzko seinaleak errotulu horien osagarriak izango dira eta, beraz, hauek baino tamaina txikiagoa izango dute.

2.– Era berean, "Bingo" hitza hotel edo konplexuaren merkataritzako izenaren zatitzat erabil daiteke, bingoan jokatzeko lokala barruti honetan badago behintzat.

**54. artikulua.**– Sustapen-jarduerak.

Bingoan jokatzeko lokalen sustapen-jarduerak jendea informatzeko baino ez dira. Debehatuta daude jendea sinestaraztea helburu duten mezuak edo zuzenean jokatzera bultzatzen dutenak.

**55. artikulua.**– Baimendutako sustapen-jarduerak.

Betiere honako sustapen-jarduerak baimenduko dira:

- a) Lokala eta honen kokapena eta zerbitzu osagarriak eguneko prentsan aipatzea.
- b) Iragarki eta turismo-erreportajeetan bingoan jokatzeko lokala eta bertako instalazioak aipatzea, baita orokorrean zein lokala kokatzen den udalerrri edo gunean eskaintzen diren zerbitzuen zerrenda ematea ere.
- c) Aisia- eta bidaia-aldizkari espezializatuetan edo sektorekoetan lokalaren berri ematea.
- d) Bingoan jokatzeko lokalari eta honen zerbitzu osagarriari buruzko foiletoak prestatu eta bidaltzea. Foileto hauek hoteletan, bidaia-agentzietan, bidaiarien garraiorako zentroetan eta jendaurreko ikuskizunetarako lokal edo instalazioetan jar daitezke.
- e) Bingoan jokatzeko lokalaren izena erabiltzea jendaurreko ikuskizun zehatzak edo jolas-, kirol- edo kultura-jarduera zehatzak babesteko, adin txikikoentzako direnak salbu.

f) Urtero, bingoan jokatzeko lokalean jaialdia antolatzea. Horretarako, egin beharreko ekintzak labur-labur adieraziko dira alde zurretik. Ez da beharrezkoa udalerrri edo herriko zaindariaren jai, Gabon-gaua eta Urtezahar gaua ospatzeko egiten diren jaialdien berri ematea.

**56. artikulua.**– Baimentzeko baldintzak.

1.– Bingoan jokatzeko lokalaren inguruko informazioa eman ahal izango da prentsan eta irratan, enpresak zerbitzua hobetzeko inbertsioak egin eta establezimendua jendearentzako itxi behar badu. Nolanahi ere, honako baldintzak bete behar dira:

a) Lokala egun osoan egongo da itxita eta, gutxienez, hiru egunez jarraian.

b) Erakunde edo enpresa eskatzaileak egin beharreko berritzeen eta itxita egongo den egunen memoria erantsiko du.

2.– Sei hilean behin, arlokako informazio-sustapenak egin daitezke jendeari bingoan jokatzearekin erlazionatuta dauden zenbait alderdiren berri emateko. Jarduera honek herria, lurralde historikoa edo autonomia-erkidego osoa har ditzake bere baitan.

3.– Kirol-jarduerak banaka zein arloka babes daitezke, baita erakunde instituzionalek antolatu edo lagundutakoak ere, zehazki adin txikikoentzat direnean salbu.

4.– Sustapen-jarduerak baimentzeko eskaeretan, hedatu nahi den informazioaren edukia, formatua eta iraupena adieraziko dira.

**57. artikulua.**– Publizitate komertziala.

Bingoan jokatzeko lokaletan publizitate komertziala jar daiteke, baldin eta honek ez badu jokoaren garapena oztopatzen.

**58. artikulua.**– Opariak emateko debekua.

Debekatuta dago bingoan jokatzeko lokalera etortzen direnei edozein motatako objektuak saltzea edo oparitzea. Halaber, debekatuta daude ostalaritzan gonbit orokorrak egitea, 54. artikuluko f) idatz-zatian zehazten diren jaiak ospatzen direnean salbu.

## XII. KAPITULUA

### IKUSKAPENA

**59. artikulua.**– Ikuskatzailetzari eman beharreko informazioa.

1.–Bingoan jokatzeko lokaletako langile guztiek joko-arloko jarduerak kontrolatzeari buruzko informazioa eta agiriak eman beharko dizkiete Joko eta Ikuskizun Zuzendaritzatik datozela behar bezala egiaztatzen duten ikuskatzaile eta funtzionarioei.

2.– Lokalaren atarian edo sarreran, bingoan jokatzeko lokala baimentzen duen agiria erakutsiko da nahitaez, baimenean bertan zehazten den eduki eta formatuarekin.

3.– Era berean, Joko eta Ikuskizun Zuzendaritzari dagokio Euskal Autonomia Erkidegoko bingoan jokatzeko lokalak ikuskatzea, ikuskizunen arautegian ezarritakoa betetzen dela egiaztatzeko.

### XIII. KAPITULUA

#### ORDUTEGIA

**60. artikulua.**– Bingo-aretoen ordutegia.

1.– Bingoan jokatzeko lokalak 16etatik aurrera irekiko dira. Lokal hauek ordutegien arloko arautegian ezartzen den orduan itxiko dira beranduenez.

2.– Bingoan jokatzeko lokaletarako baimentzen den jarduera-ordutegitik kanpo, lokalak jokorako ez beste xede batzuetarako erabili ahal izango dira, Joko eta Ikuskizun Zuzendaritzak baimena eman ondoren.

3.– Bingoan jokatzeko lokalaren titular den enpresak orduen aldetik ezarri diren mugen barruan zehaztuko du partidak zein ordutan hasi eta amaituko diren. Azken partida jokatzekoan, beren beregi iragarriko zaie jokalariei eta inoiz ez da gehienez baimendutako ordua baino beranduago hasiko.

### XIV. KAPITULUA

#### ZERBITZU OSAGARRIAK

**61. artikulua.**– Ostalaritza- eta ikuskizun-zerbitzua.

Bingoan jokatzeko lokalen barruan ostalaritza- eta ikuskizun-zerbitzuak jarri ahalko dira, baldin eta jokalarientzat baino ez badira. Orduen aldetik zerbitzu horiei dagozkien mugak bingoan jokatzeko lokalarenak izango dira.

**62. artikulua.**– Joko-makinetarako lokal zehatzak.

Bingoan jokatzeko lokaletan joko-makinak instalatzeko lokal zehatzak baimen daitezke. Leku horiek harrera-gunetik eta gainerako joko-aretoetatik bereizita egongo dira eta indarrean dagoen arautegiak lokal horiei buruz ezartzen dituen betekizunak beteko dituzte.

### XV. KAPITULUA

#### ZEHATZEKO ARAUBIDEA

**63. artikulua.**– Administrazio-ko arau-haustekak.

1.– Jokoa arautzen duen 4/1991 Legeko 24. artikuluan eta ondorengoetan ezarritakoarekin bat etorritik, Arautegi honetan xedatutako arau-haustekak arinak, larriak edo oso larriak izan daitezke.

2.– Jokoa arautzen duen 4/1991 Legeko 25. artikuluan xedatutakoari jarraiki, honakoak dira arau-hauste oso larriak:

a) Administrazio-baimenik gabe bingo-jokoa antolatzea, egitea, ustiatzea edo horretan aritzea; halaber, baimendutako lokal edo esparruetatik kanpo edo baimendu gabeko pertsonen bidez joko hori egitea edo horretan aritzea.

Bingo-enpresetako elkarten kapitala arau ezarritako mugetatik behera murriztea

c) Administrazioaren baimenik izan gabe akzio edo partaidetzak eskualdatzea

d) Homologatu gabeko joko-osagarri edo elementuak erabiltzea eta material bera ordeztzea edo iruzurrez manipulatzeko.

e) Jokoa kudeatu, antolatu eta ustiatzeaz arduratzen diren enpresetako langileek eta zuzendariak, akzionistek, partaideek edo titularrek, baita

ezkontideek edo lehen mailako aurreko zein ondorengo ahaideek ere, enpresa horiek kudeatu edo ustiatzen dituzten jokoetan parte hartzea, hala zuzenean nola hirugarrenen bidez.

f) Ezarritako sarien banaketa eta ehunekoak aldatzeko asmoz jokoak manipulatzeari.

g) Jokoa arautzen duen Legeko 23. artikuluko 3. zenbakiak ezartzen duen bezala, joko-enpresen zerbitzura dauden pertsonen bingoan jokatzeko lokaletan maileguak ematea.

h) Datu faltsuak edo manipulaturako agiriak ekarriz dagozkion baimenak lortu izatea eta horiek emateko oinarritzat hartu ziren arauak haustea.

i) Baimen horiek emateko zehaztu diren baldintzak ez betetzea.

j) Apustulari edo jokalariei irabazi dituzten kopuruak osorik zein partzialki ez ordaintzea, baldin eta hutsegitea ez bada hutsegite larritzat jotzen.

k) Baimenik gabeko lokaletan edo baimenik ez duten pertsonen jokatzeko aukera eskaintzea, eta jokatzeko elementuak baimenik gabe instalatu eta ustiatzea.

l) Joko-makinak edo makina laguntzaileak administrazio-baimenik gabe edo baimendutako kopurua baino gehiago instalatzea.

m) Adin txikikoei lokal horietan jokatzeko baimena ematea edo jokatzen uztea.

n) Jokoen publizitateari buruzko arauak haustea.

o) Urtebeteko epean bi arau-hauste larri egitea.

3.– Jokoa arautzen duen 4/1991 Legeko 26. artikuluan xedatutakoari jarraiki, honakoak dira arau-hauste larriak:

a) Araudi honen eta baterako arautegiaren arabera debekatuta duten pertsonen bingoan jokatzeko lokaletan sartzen uztea.

b) Bisitarien erregistroa eta sarrera-kontrolerako erregistroa behar den moduan ez egotea edo osatu gabe egotea.

c) Agintaritzako agenteek eta, zehazki, horretan diharduten funtzionarioek aurrera daramaten kontrol eta zaintzako ikuskatzailatza-ekintzari uko egitea edo oztopoak jartzea.

d) Bingoan jokatzeko establezimenduan eta, orobat, baimendutako makinetan, araudi honetan eta baterako arautegian ezarritako baimenen egiaztagiriak ez erakustea.

e) Lokaletan segurtasun-neurriak ez egotea edo kaxkarrak izatea.

f) Apustulari edo jokalariei irabazi dituzten kopuruak osorik zein partzialki ez ordaintzea, baldin eta kopurua 3.005,06 eurokoa edo gutxiagokoa bada.

g) Lokalaren gehieneko edukieraren arabera, baimentzen direnak baino pertsona gehiago onartzea.

h) Jokalari edo apustulariak adeitasunik gabe tratatzea, bai jokoan zehar, bai kexak edo erreklamazioak aurkezten dituztenean

i) Orduen aldetik joko-establezimenduetarako ezarri diren mugak gainditzea.

j) Urtebeteko epean hiru arau-hauste arin egitea.

k) Aurreko artikuluan aurreikusitako arau-hausteetako bat egitea, baldin eta horren izaera, zergatia edo inguruabarra kontuan hartuta oso larritzat kalifikatzen ez bada.

4.– Jokoa arautzen duen 4/1991 Legeko 27. artikuluan xedatutakoarekin bat etorriz, arau-hauste arinak dira Lege horretan eta Araudi honetan ezartzen diren baldintza edo debekuetakoren bat ez betetzea (baldin eta larritzat edo oso larritzat kontsideratzen ez badira), baita aurreko artikuluan aurreikusitako arau-hausteetakoren bat ez betetzea ere (baldin eta horren izaera, zergatia edo inguruabarra kontuan hartuta ez bada larritzat kalifikatzen).

5.– Araudi honetan bildutako arau-hausteak Jokoa arautzen duen 4/1991 Legeko IV. Kapituluan ezarritako zenbatekoan eta bertan adierazten diren araubide eta prozedurarekin bat etorriz zehatuko dira.

#### XEDAPEN GEHIGARRIAK

##### **Lehenengoa.**

1.– Interkonektatutako bingo pilatua jokatu ahal izateko, beharrezkoa da Euskal Autonomia Erkidegoan dauden bingoan jokatzeko lokal guztien artean gutxienez %55a modalitate horretara atxikita egotea.

2.–Interkonektatutako bingo pilatuaren modalitate honetara atxiki nahi duten bingoan jokatzeko lokalen titularrek 10 egun balioduneko epea izango dute Joko eta Ikuskizun Zuzendaritzari eskaera egiteko. Horrezaz gain, une horretan bingo pilatu moduan dagoen kopurua adieraziko diote. Araudi hau indarrean sartu eta modalitatera atxikitzea eskatzen ez dutenek urtebete igaro arte ezingo dute berriro eskatu.

Bingoan jokatzeko lokal berrien titularrek lokala instalatu eta abiarazteko baimena ematen denetik hasi eta hilabeteko epea izango dute interkonektatutako bingo pilatuaren sistemara atxikitze eskaera egiteko. Hala egiten ez badute, aurretik ezarritako gabealdiari lotuko zaizkio.

3.– Araudi hau indarrean sartzetik eta interkonektatutako bingo pilatuaren hasierako kopurua zenbatze aldera, honela jardungo da: Bingo pilatu eta interkonektatutako bingo pilatu moduan bingoan jokatzeko aretoetan metatzen diren kopuruek (erreserbak barne) osatuko dute interkonektatutako bingo pilatuaren hasierako zenbatekoa. Joko-modalitate honetarako ezarritako gehieneko kopurua gainditzen bada, behin bakarrik eratuko da erreserba, interkonektatutako bingo pilatua banatzen den arte. Prozesu hau Araudia indarrean sartzetik zenbatzen hasi eta gehienez ere hilabeteko epean gauzatuko da.

##### **Bigarrena.**

1.– Araudia indarrean sartzetik denean bingo-aretoak instalatzeko baimenen titular diren ongintza-, kirol-, kultura- eta turismo-erakundeek, beren izaerari eutsi artean, jarduera horrekin jarraitu ahal izango dute eta ez dute zertan Araudi honen 6. artikulua eta hurrengoek arautzen duten enpresa-forma hartu.

2.– Halaber, Araudia indarrean sartzean dauden hirugarren kategoriako bingo-aretoek beren jarduerarekin jarraitu ahal izango dute, baldin eta baimendutako edukiera eta makina-kopurua errespetatzen badituzte.

3.– Araudi hau indarrean sartzean gehenez ere 149 pertsonako edukiera duten eta hirugarren kategoriako areto gisa sailkatuta dauden bingo-aretoak bigarren kategoriakotzat hartuko dira sailkapen horren ondoretarako. Gainerakoan, ordea, Xedapen Gehigarri honen aurreko zenbakietan xedatutakoa aplikatuko zaie.

4.– Aurreko idatz-zatietan xedatutakoa gorabehera, enpresari dagokion jokorako lokalaren titulartasuna aldatzen bada edo sozietate den enpresaren akzio edo partaidetzen kapital sozialetik %50a baino gehiago eskualdatzen bada, bingo-aretoa nahitaez Araudi honetako aginduetara egokituko da.

### ***Hirugarrena.***

Ordezko kasuetan, Araudi honek bingo tradizionalaren jokorako ezartzen dituen agindu guztiak aplikatuko zaizkie interkonektatutako bingo pilatuari eta sari "bereziari".

### ***Laugarrena.***

Araudi honen 19. artikulua bingo-areto izango den barrutiarentzat aurreikusten dituen baldintzak Araudia indarrean sartzetik aurrerantzen diren baimen-eskaerei bakarrik aplikatuko zaizkie.

## **XEDAPEN IRAGANKORRAK**

### ***Lehenengoa.***

Euskal Autonomia Erkidegoko bingo-jokoari buruzko Araudia onesten duen Dekretuko Lehenengo Xedapen Iragankorrean aurreikusitakoa gauzatu artean, baimendutako joko-txartelen ereduak jarraituko dute indarrean.

### ***Bigarrena.***

Araudi honetako 19. artikuluan aipatzen den Joko eta Ikuskizunen zuzendariaren Ebazpenak zehaztapenak ezartzen dituenetik hasita, hiru hilabeteko epea egongo da bingoan jokatzeko lokal guztietan Onarpen Erregistroaren sistema informatikoa erabilgarri egon dadin.

### ***Hirugarrena.***

1.– Bingoan jokatzeko lokalen titular guztiak Araudi honen 15. artikuluan aipatzen diren fidantzari buruzko arau berrietara egokituko dira, Araudia indarrean sartzetik zenbatzen hasi eta bi hilabeteko epean. Egun dauden fidantzak berriak egiten direnean eta, aurreko arautegiarekin bat etorritik, ordaindu beharrekorik ez dagoenean jaso ahal izango dira.

2.– Bingo pilatuaren modalitateetan jokatzeko ez dutenek egindako fidantza mantendu ahal izango dute, Araudi honetako 15. artikuluan aurreikusitako afektazioarekin.

## AZKEN XEDAPENAK

Lehena.- Herrizaingoko sailburuak izango du honako Dekretu hau garatzeko eta gauzatzeko beharrezko diren xedapen guztiak emateko ahalmena; eta batik bat, honako hauei dagozkiena:

- a) Bingo-jokoaren modalitate ezberdinetan erabili beharreko joko-txartelen ereduak eta ageriko balioa.
- b) Bingo-jokoaren modalitate ezberdinetako joko-arauak.
- c) Dekretu honetan ezarritako balizko konbinazio-lote bakoitzaren joko-txartelen kopurua aldatzea, eta bingo modalitateetako sarien ordena aldatzea.
- d) Bingo-jokoaren modalitate ezberdinetako sariak banatzeko ehunekoak